

Un bista riba un bida afecta pa autismo



ORANJESTAD - Jerry Newport te cu su 40 y pico aña tabata djis un homber straño, cu tabata su so henter ora. E no tabata compronde pakico e tabata diferente, y pakico su bida no tabata manera di cualkier otro. E tabata hopi sabi, un genio matematico, pero e unico cos cu e por a

haci pa un tempo ta core un taxi, y despues cu e compania a haya cu e a kibra demasiado auto, ata e a bolbe biba na cas di su mama. Te ora cu e a descubri na edad di 41, cu e ta autista. E diagnostico aki a cambia su bida, y awendia, Newport ta biaha rond mundo pa splica e bida diario di un

persona autista. Jerry Newport a bin Aruba den fin di siman, riba invitacion di Fundacion Autismo Aruba, y cu cooperacion cu e Asociacion Autismo di Corsow, pa duna publico riba nos isla, un idea con un persona cu autismo ta mira mundo. E tabata un anochi yen di harimento, ya

cu Newport a conta hopi di su aventuranan, cu por ta parse pret pa otro, pero en realidad tabata isol'e mas di hende 'normal.' E presentacion di Newport tabata e prome evento di FAA pa recauda fondo, y a inclui tambe subasta di un obra di area maestral di Elise Lejuez. E atendencia tabata

grandi y e anochi tabata un exito, tanto pa esnan cu a haya sa mas di e defecto misterioso di autismo, pero tambe pa e fundacion.

Bon Dia Aruba lo amplia mas riba e presentacion di Newport y e anochi mes, den un siguiente edicion.

